

示凡爾等竝未來一切眾生依我之言各凜三緘之誠靜默持已毋炫才智毋逞舌鋒恪謹語言時存畏懼慎之於未言之先省之於方言之際妄言不生綺語不作戒謹兩舌永斷惡口如此洗滌可以修身可以事天進德之基是惟至要

防邊意業章第六

口業淨已然口所從出皆起於意諸意由心生心爲身主防閑宜嚴若非平時戒謹以義制事以禮制心則惡孽時萌便難降伏身口兩業俱不克淨矣意之可畏喻如馴馬惟在制御有方勿令奔放所以古昔聖賢訓人謹獨惟能謹獨則意之所發誠實無妄貪瞋癡業無由得生而意可淨矣然所謂貪非特作威

道藏輯要

同參經

主

室集三
八百九

苛取嗜利無厭棄法通賄贖貨無涯始謂之貪凡商賈網利市廛多方壘斷豪強詭謀漁利錙銖靡遺皆謂之貪太上云不見可欲使心不亂難得之貨令人行妨曲禮曰分無求多蓋貪心一生則只知利已罔恤乎人善念由此而消惡業緣斯而起然貪有多端說不能盡如所貪在名則意爲之牽患得患失無所不至倘有弗遂恣怨於人貪乃化而爲瞋所貪在利則思奪人所有飽已之欲機械變詐甚於穿窬子輿氏云雞鳴而起孳孳爲利卽蹠之徒豈不化而爲盜乎所貪在色美好是耽佚樂無度寡廉鮮恥帷薄不修貪更化而爲淫矣凡此貪業發之於心見之於行或恃勢凌人而脅其拱伏或巧肆詐謀以徇其順從

身口諸業由斯而集貪業之害生生死死無有窮竟甯不畏歟
吾今剖晰曉示爾諸學人務須潔清自矢以淨爾意毋得貪求
致罹惡趣其一曰瞋瞋之爲害譬如猛火烈焰一熾勢同燎原
不可撲滅不可嚮邇陰符經云火生於木禍發必尅是以古昔
佛仙務行忍辱以除瞋恚之火太上曰上善若水水善利萬物
而不爭故幾於道柔勝剛弱勝強曲禮云很毋求勝人能柔弱
自下不求勝於人尙何瞋乎昔儒門賢哲若顏子之不校孟氏
之自反皆以瞋爲害道故雖非義之加橫逆之犯皆恬然受之
而不與計也世之愚夫見人忤已輒思報復每致仇怨相攻小
則惡口交譏大則挺刃殘殺遂有一朝之忿忘身及親之禍是

道藏輯要

同參經

圭

室集三

又文川

瞋之一業潛伏於內則身口二業顯肆於外而愚人迷誤至死
弗知可不悲歟其一曰癡所謂癡者非冥然無識昏庸暗昧之
謂也人苟謬執已見偏向一途不知大道不達正理邪見痼蔽
莫識醒悟迷性既深雖遇至人語以正道彼終不悔似此癡人
實爲懵懵更有一等才智之人明知世事皆幻繁華易盡一切
所有咸歸於空無如愛慾難除愛情難割雖欲強制旋踵卽迷
正知正見無由得開譬彼杲日障於雲霧自性不明終身迷惑
及至物消形化始悔從前晚矣晚矣然此身口意業淨有難易
身口二業見之於外猶易檢點苟有明理者其或能之惟意隱
而弗露人不易知較身口尤爲難制淨茲三業是謂十善十善

周備即可生天運茲三業是謂十惡十惡輪迴卽沈苦趣爾諸
學人慎茲三業可與入道

究論性本章第七

既淨三業務明至道至道之要難以名言無形而能形形無象
而能象象聲以之聲而實無聲色以之色而實無色窈冥恍惚
不可以智知不可以識識其有也無物不有其無也天地不知
天且弗知而况於人乎然斯道也求之則沖漠無朕體之則眞
實不虛天地此道人物此道虛而能實實而能虛自無而有自
有而無無有無有有無有其理深杳其義奧妙太上曰杳之
又杳文始帝君曰非有道不可言不可言卽道然道雖無名強

道藏輯要

同參經

古

室集三

名曰道既名曰道豈終不可求乎易曰一陰一陽之謂道子思
子曰率性之謂道人秉一陰一陽而生性卽吾心而有修道之
要亦卽於一陰一陽中體之然道本一元而教有殊途功亦微
異釋道二門皆尙存虛若夫儒流惟敦實踐故易云仁者見之
謂之仁知者見之謂之知此卽教分三門之說也蓋道之體雖
虛道之用則實善體道者直窮性命精進不已一旦豁然無不
了徹此乃一超直入上根能之至於中下之人惟從日用動靜
中躬行實踐及踐履功深得遇明師一點卽悟是爲由用得體
下學上達雖功分難易而至於明道則一也若修道之士能於
每日無事未與物接時存心默會內照反觀則本原道體不事